

সূরা - ৯২

রাত্রি

(আল্-লাইল, :১)

মক্কায় অবতীর্ণ

আল্লাহর নাম নিয়ে, যিনি রহমান, রহীম।

- ১ ভাবো রাত্রির কথা, যখন তা ঢেকে দেয়,
- ২ আর দিনের কথা যখন তা ঝলমল করে;
- ৩ আর তাঁর কথা যিনি পুরুষ ও নারী সৃষ্টি করেছেন।
- ৪ নিঃসন্দেহ তোমাদের কর্মপ্রচেষ্টা অবশ্য বিভিন্ন প্রকৃতির।
- ৫ সুতরাং যে কেউ দান করে ও ধর্মভীরুতা অবলম্বন করে,
- ৬ এবং সুষ্ঠু-সুন্দর বিষয়ে সত্যনিষ্ঠ থাকে,
- ৭ আমি শীঘ্রই তার জন্য তবে সহজ করে দেব আরাম করার জন্য।
- ৮ কিন্তু তার ক্ষেত্রে যে কৃপণতা করে ও নিজেকে স্বয়ংসমৃদ্ধ জ্ঞান করে,
- ৯ এবং সুষ্ঠু-সুন্দর বিষয়ে মিথ্যারোপ করে,
- ১০ তার জন্য তবে আমি অচিরেই সহজ করে দেব কষ্ট ভোগের জন্য।
- ১১ আর তার ধনসম্পদ তার কোনো কাজে আসবে না যখন সে অধঃপাতে পড়বে।
- ১২ নিঃসন্দেহ আমাদের কর্তব্য তো পথনির্দেশ করা;
- ১৩ আর নিঃসন্দেহ আমরাই তো মালিক পরকালের ও পূর্বকালের।
- ১৪ সেজন্য তোমাদের সাবধান করে দিচ্ছি লেলিহান আগুন সম্বন্ধে;
- ১৫ তাতে প্রবেশ করবে না নিতান্ত হতভাগ্য ব্যতীত—
- ১৬ যে মিথ্যারোপ করে ও ফিরে যায়।
- ১৭ আর এর থেকে আলবৎ দূরে রাখা হবে তাকে যে পরম ধর্মভীরু—
- ১৮ যে তার ধনদৌলত দান করে, আত্মশুদ্ধি করে;
- ১৯ আর কারো ক্ষেত্রে তার জন্য এমন কোনো অনুগ্রহসামগ্রী নেই যার জন্যে সে প্রতিদান দাবি করতে পারে—
- ২০ তার মহিমাশ্রিত প্রভুর প্রসন্নবদন কামনা ব্যতীত।
- ২১ আর অচিরেই সে তো সন্তোষ লাভ করবেই।